

Dithero tsa Tirelano mo Kutlwanong

07/2015 Thero ka letsatsi la 1 la ngwaga o mošwa, gongwe la go gopola thupiso ya Morena. e le ka 01. 01. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang letsatsi leno: Morwa motho o tsile go batla le go pholosa se se latlhegileng.

1.Sefela sa 79 - 74/77

2. Thapelo: Morena, Modimo, Rara yo o mo legodimong, re a leboga, re lebogela bopelotlhomogi jo bogolo jwa gago, ke wena yo o re sikareng, go fitlha mo letsatsing la kajeno. Re lebogela phatlha e ntle e go bua le wena. O re abele thata gore re go sale morago ka boitumelo ka pelo yotlhe gore re ungwe maungo a tumelo ka Jesu Keresete, Mopholosi le Morena wa rona. Amen.

Morena Jesu Keresete, kajeno re a gopola, fa o ineetse ka fa tlase ga molao gore o re golole mo go ona. Re a go rapela gore o re thuse gore re ikanye wena, re itse, fa e le wena yo o re golotseng mo maleong otlhe, le mo losong, le mo thateng ya ga Satane, le mo bogaleng jwa ga Rraago jo bo senotsweng ka molao wa Modimo. O re thuse gore re go ikanye, fa e le wena yo o re golotseng gore re nne ba gago, re go tshelele, re go direle le mo ngwageng o mošwa o wa 2015. Amen.

3.Lefoko la puiso ya Testamente e kgologolo le kwadilwe mo go Gen. 17:1-8;

Epistolo ka fa thulaganyong ya 2 e kwadilwe mo go Bagalata 3:26-29;

Efangele ka fa thulaganyong ya 3 e kwadilwe mo go Luka 4:16-21.

4.A go ipolelwe tumelo ya bokeresete!

5. Sefela sa 75 - 70/73

6. Thapelo: A re rapeleng, re re: Modimo Mong-wa-thata-yotlhe, Rara yo o mo legodimong, wa dira Morwao yo o tsetsweng a le esi gore e nne Mopholosi wa batho botlhe, le go mo thaya leina le legolo tota, e bong Jesu, re a kopa gore o re abele ka bopelothomogi jwa gago gore ba re go direlang mono mo lefatsheng mo leineng la gagwe re itshwarelele mo go ene ka go dumela mo go ene yo o ntseng ka fa le le jang la gago mo legodimong. Amen.

7. Efangele ka fa thulaganyong ya 1 e kwadilwe mo go Luka 2:21, e re: "E rile malatsi a a robedi a sena go feta a gore ngwana a rupisiwe, leina la gagwe la bidiwa JESU, le a le teilweng ke moengele, a ise a ithwalwe." Amen.

8. Thero: Ditsala tse di rategang tsa Morena wa rona Jesu Keresete, kajeno mo lefatsheng lotlhe batho ba sadisitse ngwaga o o fetileng pila ka go simolola ngwaga o mošwa o wa 2015. Ke nako ya go simolola tse dintšhwa, le fa go tla tsaya nakonyana go itlwaetsa ka tse dintšhwa tseo. Ke nako ya go tswelela pele, le fa tsa pele di sa ntse di re ngaparela, di sa ntse di re ngaparela mo dikgopolegong tsa rona, gongwe go sa ntse go na le dingwe tse di tshwanetseng go baakanngwa, gongwe dintho le matlhoko a a tshwanetseng go alafiwa. Bangwe ba letela gore ditoro tse di rileng di diragale, gongwe tse ba di solofeditsweng. Tsa ngwaga o mošwa di re fa phatlha go simologa sešwa. Mo go tse tsotlhe tseo ke lo eleletsa ngwaga wa 2015 o mošwa o o tshegofaditsweng tota. A e nne ngwaga o o tshegofaditsweng mo go lona ka tswelelo-pele ka fa tlase ga bopelotlhomogi le bopelontle jwa Modimo o o Borarobongwe, e bong Rara le Morwa le Mowa o o Boitshepo. Kagiso le bopelontle jwa ona di lo felegetse kajeno le mo malatsing otlhe a ngwaga o mošwa le mo botshelong jotlhe jwa lona.

Kajeno re keteka moletlo o mongwe ka go gopola se se diragetseng gangwe fela. Ke moletlo tota, ga ke raye letsatsi la boikhutso fela, mme ke la segopotso tota, e le moletlo o o boitshepo, e le letsatsi le le supang maikaelelo a Modimo o a ikaelelang go direla batho ka tse o di ba baakanyeditseng, e bong tse di pholosang batho botlhe ka dikgakgamatso tse dikgolo. Ke tse di farologanngwang le tse di diragalang ka malatsi otlhe ka ditshegofatso tsa ga Rara yo o mo legodimong tsa tiholego, tsa go nesetsa ba ba siameng le ba ba bosula pula, gongwe fa o tshubela batho botlhe letsatsi go ba sedifasetsa mo lefifing. Nyaya, kajeno re gopola se se farologanyang le tsa tiholego fela, ke raya e le tse di kopanyeng le thato ya Modimo ya lorato lo logolo lwa go pholosa batho botlhe, le go ba golola mo bosuleng, mo losong, mo boleong, le mo thateng ya ga Satane, le go goroga mo kitsong ya boammaaruri jo bo pholosang. Ke letsatsi le le tshwanang le malatsi otlhe a kereke e gopolang ka ona ditiro tse dikgolo tsa Modimo, e le tse di gakgamatsang tsa go baakanyetsa batho botlhe gore ba pholosiwe ka ditsisa tshegofatso, ka Lefoko la boitshwarelo, le disakaramente tse Modimo o abelang ka tsona pholoso ka boitshwarelo mo leineng la ga Keresete.

Mo ntlheng ya bokone ya lefatshe kereke ya bokeresete bo dira Keresemose ka nako, fa matsatsi a fetoga gape gore letsatsi le tlhabe ka pele, le diege ka go phirima, jaaka go diragala mono mo borwa ka Seetebosigo. Kwa bokone ga kgethwa Sedimonthole e tshotse a a 25 go nna letsatsi la go gopola botsalo jwa Morena gore go supediwe, fa go simologile gape kwa moseja kwa bokone go ata lesedi la letsatsi, go ngotlafala lefifi la bosigo. Ke sesupo se se supang go ata ga lesedi ka go gopola botsalo jwa Morena ka Sedimonthole 25. Kana go molemo go dira tsa bokeresete ka go dumalna, le fa mo go rona go sa supediwe go ata ga lesedi ka tsamao ya lefatshe mo go rona.

Gape letsatsi leo le le tlhomilweng le dira gore re nne le dibeke tse nne mo sebakeng sa Adfente, re dire moletlo wa go gopola botsalo jwa Morena, re itumelele boammaaruri jwa gore Morwa Modimo ya amogela botho ka go tsalwa ke Maria, ka botho jwa gagwe ke se segolo thata, re be re bone phatlha ya go gopola kgakgamatso eo, go tloga mo Sontageng wa 1 mo sebakeng sa Adfente, go ya mo Sontageng wa bofelo mo sebakeng sa Epifania, go ya re atamela mo sebakeng sa go gopola dipogo tsa Morena wa rona. Mo sebakeng seo re a gopodiwa ka ditiragalo bogolo, jaaka ka tiragalo ka ga badisa, le molaetsa wa moengele, le batlhalefi ba botlhabatsatsi ba bona naledi, le go tla kwa Bethlehem go obamela ngwana, ditiragalo tsa go tshabela kwa Egepeto, le go boela kwa Nasareth, le go dira ga Jesu mmogo le Josefa ka go nna mmetli, go ya a simolola go iponatsha mo ponatshegong, a kolobediwa ke Johane mo Joredane, a raelwa ke Satane mo sekakeng, lenyalo kwa Kana, le ditiro tsa ga Jesu tsa go alafa balwetsi le go dira dikgakgamatso tse dingwe, le dithero tsa gagwe, go ya a ne a tthatlogela go ya kwa Jerusalema, a ntse a itse gore kwa Jerusalema o tshwanetse go boga, le go bapolelwa mo sefapaanong. A Modimo o lebogwe, ka re na le Disontaga gore re utlwe ditiragalo tsotlhe tseo tse di kwadilweng gore le rona re dumele mo go Jesu wa Nasareth yo e leng Mopholosi le Mogolodi wa lefatshe, Kwana e e sikareng maleo a lefatshe, e le Morena le Modimo wa rona.

Kajeno ke letsatsi le ntlha la Ferikgong, e le letsatsi la borobedi morago ga moletlo wa go gopola botsalo jwa Morena. Ke ka ntlha ya moo, fa kereke ya bokeresete e gopola kajeno thupiso ya lesele Jesu ka go rupisiwa ka thupiso e e boitshepo thata, jaaka re utlwile ka Efangele e e kwadilweng mo go Luka moitshepi gore "e rile malatsi a a robedi a sena go feta a gore ngwana a rupisiwe, leina la gagwe la bidiwa JESU, le a le tlhweng ke moengele, a ise a ithwalwe." Tlhokomela gore Morena wa rona Jesu Keresete yo e neng e le Morwa Modimo go tswa mo bosenangtshimologo, pele ga tlole go ya legodimo le lefatshe, le dibopiwa tse dingwe a tsalwa go nna motho ruri ke Maria wa lekgarebe le le tlhogonolofaditsweng, le go tshegofadiwa mo basading. Mowa o o Boitshepo wa tla mo go lona, le thata ya Mogodimodimo ya le ritifalela, gore ngwana yo o boitshepo yo o neng a belegwa ke lona a bidiwa Morwa Modimo. Bomodimo jwa gagwe le botho jwa gagwe bo sa tlhakatlhakanngwa, le e seng go kgaoganngwa, e le yo o esi yo o tsetsweng a se na boleo, e se moleofi, yo o neng a tshela mo lefatsheng e le Moitshepi mo dinyageng tsotlhe a ntse a tsamaya mo lefatsheng. Fela jalo peresona ya bobedi ya Modimo ya utlwa thato ya ga Rraagwe ka boikanyego jo bogolo, e sa tlole taolo epe ya ga Rraagwe, ya mo utlwa go ya losong, e bong loso lwa sefapaano. Mo sefapaanong Jesu o ne a bogisiwa mo boemong jwa rona go re baakanyetsa pholoso ka botlalo. Ka kutlo ya gagwe le botshelo jwa gagwe jwa boitshepo a dirafatsa molao wa Modimo le thato ya ona, a phimola bogale jwa ga Rraagwe, le go dirafatsa tsotlhe tse di lopilweng ke Moatlhodi wa legodimo le lefatshe ka go baakanyetsa batho botlhe kagiso le Modimo, le bopelotlhomogi jwa ona. Ke gona ka moo leina la

gagwe le bidiwa Jesu, gonne ke Mopholosi wa lefatshe lotlhe, a romelwa tiro eo ka go tsalwa ke mmaagwe yo o boitshepo kwa Bethlehem. Ke ka ntlha ya moo, fa a rupisitswe ka letsatsi la borobedi a sena go tsalwa kwa Bethlehem, gonne basimane ba ne ba rupisiwa ka letsatsi la borobedi ka fa taolong ya Modimo mo go Baiseraele ka seatla sa ga Moše mo sebakeng sa Testamente e kgologolo (Gen. 17:10-14). Ka jalo Jesu o ne a tsholola dithothi tsa ntlha tsa madi a a boitshepo a gagwe, a dirafatsa molao ka botlalo, a re direla tsotlhe tseo go re baakanyetsa boitshwarelo jwa maleo otlhe mo boemong jwa rona. Mo sefapaanong a re thololela madi otlhe a gagwe ka ntlha ya rona le go pholosiwa ga rona gore re nne le kagiso le Modimo, re nne ka fa tlase ga bopelotlhomogi jwa ona go ua bosenangbokhutlo. Ka moo re thaba sefela mmogo le mmoki wa Dipesalome, re re: "Morena, Modimo, leina la gago le galaediwa jang mo lefatsheng lotlhe? Motho ke eng gore o mo gopole, le Morwa motho a re lekole? Wena, Morena o Rraetsho le Mopholosi wa rona. Leina la gago le eme, go ya bosenangbokhutlo. Ka moo ke tumisa leina la gago, ke ntse ke tshela. Ke tsholetsa mabogo a me mo leineng la gago Amen.

9. Thapelo: Morena Jesu Keresete, Mopholosi, le Morekolodi le Mogolodi wa rona, re a go leboga, ka o re tshololetse madi a ntlha a gago mo thupisong ka botlhoko jo bogolo. Re a go leboga, ka o re golotse mo dibeng tsa rona le mo khutsong e e sa khutleng. Re a go rapela gore o re thuse gore re gomotsege, re namatshege ka boitshwarelo jo bo tswang mo go wena, re itshwarelele mo go wena mo matshwenyegong otlhe. O re utlwe ka ntlha ya leina le le rategang la gago, Jesu! Amen. Thapelo ya Morena: Rara wa rona yo o mo legodimong ...

10. Sefela sa 78 - 73/76

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. P. P. W. Weber, ka ngwaga wa 2014.

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.